



15. oktober 2024

UKA2024/86

Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat

(Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Siumup gruppia)

Soorlu siunnersuuteqartut, Siumup gruppia sinnerlugu oqaaseqartup oqaatigigaa, seqineq nuigaanngami nuisarpoq seqineq tarrikkaanngami tarrittarpoq. Piviusoq taanna qanorluunniit ilioraluarutta allanngortissinnaanngilarput.

Siumut isumaqarpoq ukiakkut 2022-mi Inatsisartut nalunaaqutaq pillugu allanngortitsimmata, kinguneri asuliinnaq tigusasaanngitsut. Naak allanngortitsinerup nalaani ilimasuutsit pitsaasuusinnaagaluartut, Siumut isumaqarpoq, kinguneri inuunitsinnut pitsaanngitsumik kinguneqarsimasut.

Siunnersuut tunngaviusumik marlussunnik imaqarpoq, tassaappullu nalunaaqutaq seqineq malillugu ingerlaqqilissasoq aamma aasaanerani nalunaaquttap siunertaqanngitsumik nikisittaqattaarnera unitsinneqassasoq. Ataatsimut oqaatigalugu UTC -3 uterfigissagipput aamma upernaakkut ukiakkullu nalunaaqutaq allanngortinneqartarunnaassasoq.

Siumup maluginiarsimavaa, innuttaasut akornitsinni amerlasuut nalunaaquttap seqinermut malinnaajunnaarnera ippigigaat, taamaammallu atsiornernik katersisitsisoqarmat innuttaasut 2.700 missaat isumaqartut, nalunaaqutaq seqinermut malinnaaliinarani aamma aasaanerani nikisittarnera atorunnaarsinneqassasoq.

Maluginiarparput inuussutissarsiortut ilanngullutik equnganerujussuaq ippigimmassuk, soorlu imaani inuussutissarsiortut aamma tunitsiviit ammasarnerisa equngasumik inissisimalernerat aningaasarsiornermut sunniuteqartoq.

Innuttaasut peqqissusiat eqqarsaatigalugu Siumut isumaqarpoq, pissutissaqartoq naatsorsuutigissallugu siunnersuut ajunngitsunik kinguneqarsinnaasoq. Siunnersuutip tunngavilersuutaani ilaatigut tikinneqarpoq, ilisimatuussutsikkut misissuinerit assigiinngitsut takutissimagaat, piffissamik nikisitsisarneq peqqissutsikkut artukkerneqarnermik malitseqarsinnaasartoq. Sunniutaasartut tamakkua sinittarnerup akornusersorneqartarneranut timittalu ingerlasarnerata allanngortinneqarneranut attuumassuteqanngitsoornavianngillat, tassami nalunaaquttap seqinermut naleqqiullugu nikinganerujussuata kingunerisaanik pitsaanngitsumik sunniuteqartarsimanissaat Siumup qularutiginnigilaa.



Siumup maluginiarpaa, tusarniaanermi akissuteqaatini innuttaasut oqariartuutaat tassaasut aaqqeeqqusisut. Ilanngukkusupparpullu pingaartumik meeqqat nikinganermut naleqqussaruminaatsitsisartut ilisimaneqarmat, aamma meeqqat adhd-mik assingusumilluunniit ersinngitsumik innarluutillit qularnanngitsumik suli sakkortunerusumik misigisaqartarsimanissaat ilimananarluinnarmat. Inuussutissarsiortut sinnerlugit akissuteqarsimasut aningaasarsiornitta – nalunaaqutaq eqqarsaatigalugu - Europamut qaninnerulernissaanik oqariartuuteqarnerupput. Nalunngikkaluarparpummi Nunatta nunarsuarmi inissisimaffia nikisissinnaanatigu, naleqqussarnerpullu nunatsinnut uagullu atukkatsinnut tunngasussaagaluartoq.

Siornatigut periutsimut uteqqinnissaq Siumut kissaatigaa aamma Inatsisinut Ataatsimiititaliamut ingerlateqqinneqassasoq inassutigaarput, tassani tusarniaanermi oqariartuutigineqartut ilanngullugit nalilersorneqarsinnaaniassammata.

Ilanngullugu oqaatigerusupparput, una siunnersuut tunniunneqarami - 27. Oktober 2024, nalunaaqutaq 24:00 - atuuttussanngortinneqassasoq siunertaasimammata. Inatsisartullu maanna ataatsimiinnerata aaqqissuuneqarnerani tamanna sapanginneqarpoq, tassami piffissaq eqqorlugu atuuttussanngortitsinissaq qissimigaarnagu ullut oqaluserineqarfissai inissitsiterneqarsimapput. Taamaammata Siumup naatsorsuutigaa, qaqugu atuutsilernissaa ilanngullugu Inatsisinut Ataatsimiititaliami oqaluserilluarumaaraat.

Taamak oqaaseqarluta suliassaq Inatsisartunut tunniupparput, naatsorsuutigalugu pineqartoq sukumiisumik inuillu qitiutillugit nalilersorneqarumaartoq.

Dines Mikaelson
Siumut